

CONVENIO DE COLABORACIÓN PARA O ANO 2026, ENTRE A CONSELLERÍA DE POLÍTICA SOCIAL E IGUALDADE E ASOCIACIÓN DE FAMILIARES DE ENFERMOS DE ALZHEIMER E OUTRAS DEMENCIAS DE LUGO (AFALU), PARA O DESENVOLVEMENTO DO PROXECTO “TEMPO DE ESCOITAR” CONTRA A SOIDADE NON DESEXADA. NO MARCO DO PLAN DE RECUPERACIÓN, TRANSFORMACIÓN E RESILIENCIA – FINANCIADO POLA UNIÓN EUROPEA – NEXTGENERATION EU.

En Santiago de Compostela, 22 de xuño de 2026

REUNIDOS

Dunha parte, Fabiola García Martínez, actuando en nome e representación da Consellería de Política Social e Igualdade, na súa condición de conselleira de Política Social e Igualdade, nomeada polo Decreto 44/2024, do 14 de abril, en uso das facultades que lle veñen atribuídas no artigo 34 da Lei 1/1983 do 22 de febreiro, de normas reguladoras da Xunta e da súa Presidencia, así como no Decreto 42/2024, do 14 de abril, polo que se establece a estrutura orgánica da Xunta de Galicia, no Decreto 49/2024, do 22 de abril, polo que se fixa a estrutura orgánica das partes consellerías da Xunta de Galicia, no Decreto 139/2024, do 20 de maio, polo que se establece a estrutura orgánica da Consellería de Política Social e Igualdade e no establecido no Acordo do Consello da Xunta de Galicia, do 27 de marzo de 1991.

Doutra parte, María del Carmen Pena Ledo, con DNI 76394497C, que actúa en nome e representación da Asociación de Familiares de Enfermos de Alzheimer e outras Demencias de Lugo (en adiante AFALU), con NIF G27285980, en virtude da súa condición de presidenta, segundo o disposto no artigo 7 dos seus estatutos, designada o 17.09.2002, e renovada pola Asemblea Xeral o 12.05.2021.

Ambas as dúas partes interveñen no nome e representación dos seus respectivos órganos e entidades no exercicio das competencias que lles están legalmente atribuídas, recoñecendo mutua e reciprocamente capacidade para obrigarse mediante o presente convenio nos termos que nel se conteñen e, para o efecto,

EXPOÑEN

Primeiro. As Administracións públicas poden celebrar convenios de colaboración con outras entidades públicas así como con persoas xurídicas suxeitas ao dereito privado ao abeiro do disposto na Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do

Consello 2014/23/UE e 2014/24/UE, do 26 de febreiro de 2014, na Lei 40/2015, do 1 de outubro, do Réxime Xurídico do Sector Público, capítulo VI do Título preliminar e máis o Acordo do Consello da Xunta do 27 de marzo de 1991, sobre convenios de cooperación con outros entes públicos e de colaboración con particulares, feito público por Resolución da Consellería de Economía e Facenda do 8 de abril de 1991.

Segundo. A Comunidade Autónoma de Galicia ostenta competencias exclusivas en materia de asistencia social, de conformidade co disposto no artigo 27.23 do Estatuto de autonomía de Galicia que se desenvolve pola Lei 13/2008, do 3 de decembro, de servizos sociais de Galicia.

Terceiro. A Consellería de Política Social e Igualdade, a través da Dirección Xeral de Maiores e Atención Sociosanitaria, segundo o establecido no Decreto 42/2024, do 14 de abril, polo que se establece a estrutura orgánica da Xunta de Galicia, o Decreto 139/2024, do 20 de maio, polo que se fixa a estrutura orgánica da Consellería de Política Social e Igualdade, ten entre as súas funcións e competencias impulsar, planificar, coordinar e avaliar o conxunto das actuacións da Consellería de Política Social e Igualdade en materia de benestar destinadas á atención das persoas maiores en aplicación da Lei 13/2008, do 3 de decembro, de servizos sociais de Galicia e da Lei 39/2006, do 14 de decembro, de Promoción da Autonomía Persoal e Atención ás persoas en situación de dependencia.

No marco desas competencias están comprendidas as funcións dirixidas ao fomento de proxectos e actividades de promoción da autonomía persoal, de promoción do envellecemento activo así como o fomento das relacións sociais e interxeracionais.

Cuarto. A soidade non desexada pode definirse como unha experiencia persoal negativa na que un individuo ten a necesidade de comunicarse cos demais e percibe deficiencias nas súas relacións sociais, xa sexa porque ten menos relacións das que lle gustaría ou porque as relacións que ten non lle ofrecen o apoio emocional que desexa, polo que é unha condición incontrolable na que a persoa experimenta e sente soidade.

Segundo a Enquisa Continua de Fogares do Instituto Nacional de Estatística, en Galicia existen:

- Entre 20 e 64 anos: 149.500 persoas viven soas en Galicia, é dicir, o 9,5% do total. Con respecto ao resto de España este peso aumenta case un punto.
- Maiores de 64 anos: 139.700 persoas viven soas en Galicia, é dicir, o 20,8% das persoas maiores, case tres puntos por baixo da media nacional (23,5%).

A estandarización de intervencións contra a soidade non desexada non é doada a priori debido

á individualidade da experiencia e á posible situación do illamento das persoas. Por iso compre enfocar as intervencións sobre a base de experiencias reais das que se poidan inferir conclusións.

A sociedade na que vivimos, afrontou desde finais do século pasado un aumento da esperanza de vida e, por tanto, un incremento da proporción de persoas maiores, esperándose que no ano 2050 dita esperanza sexa de 87,5 anos. No ano 2020, o 21% da poboación española tiña 65 anos ou máis, e espérase que esta cifra siga aumentando nos próximos anos, chegando a chamada xeración do baby boom á terceira idade.

Isto é máis pronunciado en Galicia, a nosa comunidade autónoma, onde no ano 2020, o 27% da poboación galega tiña 65 anos ou máis. Un fenómeno aínda máis marcado na poboación das áreas rurais, levando consigo un aumento da dependencia dos servizos de saúde e sociais, sendo un problema que require unha resposta integral e coordinada baseada na implementación de programas específicos e accesibles que promovan un envellecemento saudable e activo.

Porén, a lonxevidade e o envellecemento da poboación tamén traen consigo desafíos significativos, entre os que destaca a soidade non desexada. En Galicia, esta problemática é especialmente preocupante debido á dispersión poboacional e ao avellentamento máis pronunciado nas zonas rurais.

A soidade non desexada non só afecta o benestar emocional, senón que tamén está asociada con problemas de saúde física e mental, como un maior risco de depresión, ansiedade, deterioro cognitivo e enfermidades cardiovasculares. Ademais, está relacionada cunha menor esperanza de vida, o que a converte nun problema de saúde pública de primeira orde. Investigadores sinalan que a falta de interacción social pode ter un impacto tan negativo na saúde, como no benestar da persoa.

A soidade non desexada está relacionada, cada vez máis, co deterioro cognitivo, especialmente en persoas maiores. Diversos estudos demostraron que a falta de interacción social pode afectar negativamente ao cerebro co tempo.

O deterioro cognitivo inclúe problemas progresivos en funcións como memoria, atención ou linguaxe, e pode ser o paso previo a enfermidades co a demencia, ou a demencia tipo Alzheimer.

Investigacións lonxitudinais demostraron que as persoas con altos niveis de soidade, poden ter aproximadamente un 20-40% máis de risco de deterioro cognitivo ou demencia en comparación con quen manteñen redes sociais activas

En definitiva, abordar a soidade non desexada en Galicia require unha estratexia multidimensional que combine políticas públicas, iniciativas locais e o compromiso da sociedade no seu conxunto. Só a través dun enfoque integral, que vaia máis aló da asistencia e fomente un envellecemento activo e participativo, poderemos garantir que as xeracións máis maiores vivan con dignidade, saúde e benestar.

Experiencias previas mostran que intervencións baseadas en visitas domiciliarias, grupos de apoio, teléfono, etc. poden ser moi eficaces para reducir o illamento social e mellorar o benestar psicolóxico dos maiores.

A dispersión poboacional en moitos concellos galegos, xunto co progresivo avellentamento da poboación, fai que estas comunidades sexan máis vulnerables á soidade non desexada. Municipios do interior, como aqueles situados nas provincias de Lugo e Ourense (especialmente en Lugo, pola maior superficie da provincia) presentan unha alta taxa de persoas maiores que residen sen compañía, o que aumenta o risco de deterioro cognitivo, problemas de saúde mental e dependencia de servizos asistenciais. A falta de transporte e infraestruturas axeitadas tamén dificulta a súa participación en actividades comunitarias, agravando a situación.

O enfoque desta intervención estará guiado por profesionais cualificados, que deseñaran e levarán a cabo as actividades con un enfoque personalizado e adaptado ás necesidades de cada colectivo. Estes profesionais traballarán para crear un ambiente de apoio e acompañamento, no que os participantes poden expresar as súas preocupacións, compartir experiencias e desenvolver ferramentas para mellorar o seu benestar físico, emocional e social.

Todo o anterior determina a necesidade de fomentar e promover por parte da Consellería proxectos experienciais que estean orientados a reducir, paliar e loitar contra as situacións de soidade non desexada.

Quinto. Que AFALU, entidade de natureza asociativa de iniciativa social, inscrita no Rexistro Central de Asociacións con número 2019/23435-1ª, e no Rexistro de Entidades Prestadoras de Servizos Sociais da Consellería de Política Social e Igualdade co número E-1648, ten por finalidade informar, formar, asesorar e axudar ás persoas con alzhéimer promovendo

actuacións e programas destinados a mellorar a situación das familias e unha mellor atención ás persoas enfermas de alzhéimer e outras demencias.

No dito contexto, AFALU pretende desenvolver o Proxecto de atención e prevención da dependencia “Tempo de escoitar” no exercicio 2026.

A actividade principal do proxecto será a posta en marcha dunha *LINEA TELEFÓNICA* (chamadas, whatsapp), que funcionará entre as 9:00 e as 17:00 horas, de luns a venres, e que será atendido polos diferentes profesionais de Afalu (psicólogos, educadores sociais, traballadores sociais, monitores de ocio e tempo libres, auxiliares/xerocultores, mediadora comunicativa, terapeuta ocupacional).

O interese público do proxecto queda acreditado polo disposto no proxecto nº 6 (Proxectos de innovación dos servizos sociais), incluído no anexo I do Convenio de colaboración entre o Ministerio de Derechos Sociales y Agenda 2030 e a Comunidade Autónoma de Galicia para a execución de proxectos con cargo aos fondos europeos procedentes do Mecanismo para a Recuperación e Resiliencia de data 27 de agosto de 2021 e publicado no Boletín Oficial del Estado núm. 230 do 25.09.2021. Inclúense actuacións innovadoras de atención telefónica ás persoas que se atopan en situación de soidade non desexada, principalmente para persoas maiores e con discapacidade en situación de soidade non desexada. Estes servizos telefónicos incluírán un enfoque de prevención, identificación e atención ás persoas maiores que se atopan na devandita situación e serán proporcionados por persoal especialista, formado para ese efecto.

A imposibilidade da concorrencia, de conformidade co disposto no artigo 26.2 a) da Lei 9/2007, do 13 de xuño, de Subvencións de Galicia, xustifícase pola singularidade da entidade, sobre a base dunha metodoloxía de intervención xa definida, de procedementos de detección e seguimento xa implantados na provincia de Lugo de dinámicas de coordinación xa establecidas e dunha infraestrutura técnica e organizativa xa despregada no territorio.

A singularidade deste proxecto ven dada polo feito de que non solo vai a ir destinado a persoas maiores en risco de soidade non desexada, senón que ademais estas deben pertencer a un colectivo determinado como son os enfermos de Alzhéimer e os de deterioro cognitivo, a isto hai que engadir que se vai a executar nun ámbito territorial concreto como é a provincia de Lugo y que ademais se fará por unha asociación que xa ten experiencia anterior no tratamento de eses enfermos e que polo tanto está dotada tanto de infraestrutura material como persoal nese ámbito provincial.

A concesión directa da subvención a través do convenio está amparada polo dito Plan de Recuperación, Transformación e Resiliencia, en concreto encaixa no proxecto 6 incluído no anexo I do Convenio de colaboración entre o Ministerio de Derechos Sociales y Agenda 2030 e a Comunidade Autónoma de Galicia para a execución de proxectos con cargo aos fondos europeos procedentes do Mecanismo para a Recuperación e Resiliencia de data 27 de agosto de 2021 e publicado no Boletín Oficial del Estado núm. 230 do 25.09.2021

O obxectivo da Decisión de Execución do Consello Europeo, ao que contribúe é o obxectivo 325- Compoñente 22 Investimento 2 C22.I2- "Investimentos das Comunidades Autónomas para a transformación tecnolóxica e a innovación dos servizos sociais, e modernización das infraestruturas e os servizos asociados á atención á infancia e a adolescencia"

Sexto. A Xunta de Galicia, a través da Consellería de Política Social e Igualdade considera prioritario potenciar actuacións que contribúan a diminuír a soidade non desexada e fomentar a través da concesión directa dunha subvención pública a execución do dito Proxecto Tempo de escoitar contra a soidade non desexada de AFALU.

Que conforme aos requisitos previstos no artigo 19.4.c) da Lei 9/2007, do 13 de xuño, e no artigo 40 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, AFALU en Galicia é unha entidade de iniciativa social na Comunidade Autónoma que conta coa experiencia e os recursos persoais e materiais necesarios para realizar este proxecto Tempo de escoitar contra a soidade non desexada, estuda e investiga aspectos relacionados coa soidade non desexada e a súa problemática.

Así mesmo, as actuacións do proxecto recollidas na cláusula terceira, a súa adecuación ao ámbito de competencias da Consellería de Política Social e Igualdade previsto no Decreto 139/2024, do 20 de maio, polo que se establece a súa estrutura orgánica, en tanto que se trata de persoas maiores, e as específicas necesidades inherentes ao colectivo ao que van dirixidas, considéranse razóns que acreditan o seu interese social, conforme ao art.19.4.c) da Lei 9/2007, do 13 de xuño.

Esta entidade ten acreditado, que se atopa ao corrente do cumprimento das súas obrigas tributarias coa Administración pública da Comunidade Autónoma, coa Administración do Estado e coa Seguridade Social.

A concesión da subvención destínase ao Proxecto TEMPO DE ESCOITAR contra a soidade non desexada que se desenvolve de conformidade cos seguintes obxectivos e eixos operativos ou

actuacións:

Obxectivo xeral do proxecto:

- Previr e reducir a soidade non desexada, especialmente, en enfermos de Alzheimer e os de deterioro cognitivo, no ámbito territorial da provincia de Lugo.

Obxectivos específicos do proxecto:

- Identificar persoas con deterioro cognitivo e en situación de soidade non desexada
- Proporcionar acompañamento, apoio emocional e detección de situacións de risco na poboación beneficiaria.
- Detectar e previr situacións de risco, que se poidan dar nos domicilios, derivados da soidade non desexada, como por exemplo: pensamentos auto líticos, inseguridade no fogar, maltrato, caídas ou aparición de deterioro cognitivo (froito do illamento e a inactividade)
- Adaptar a intervención, ás necesidades específicas dos beneficiarios do proxecto, tendo en conta factores como o contexto, o grao de illamento ou posibles limitacións físicas.
- Favorecer a creación de vínculos sociais entre os beneficiarios do proxecto , promovendo tempos e espazos de encontros, para xerar confianza e interacción social
- Fomentar a participación comunitaria das persoas maiores, facilitando a súa implicación noutras actividades sociais e culturais do seu entorno
- Evitar que as persoas coidadoras se illen da vida social comunitaria.

Tendo en conta o que antecede, a Consellería de Política Social e Igualdade considera idóneo o impulso á AFALU para a execución do Proxecto TEMPO DE ESCOITAR contra a soidade non desexada no ano 2026.

Sétimo. A concesión da subvención directa a través deste convenio financiarase con fondos do Mecanismo de Recuperación e Resiliencia (MRR), segundo o Regulamento (UE) 2020/2094, do Consello, do 14 de decembro de 2020, polo que se establece un Instrumento de Recuperación da UE para apoiar a recuperación tras a crise da COVID-19, o Regulamento (UE) 2021/241, do Parlamento Europeo e do Consello, do 12 de febreiro de 2021, polo que se establece o Mecanismo de Recuperación e Resiliencia (MRR), Decisión do Consello de Europa, do 16 de xuño de 2021, polo que se aproba o Plan de Recuperación, Transformación e Resiliencia de España (PRTR), o Real Decreto Lei 36/2020, do 30 de decembro, polo que se aproban medidas urxentes para a modernización da Administración pública e para a execución do PRTR, a Lei 9/2021, do 25 de febreiro, de simplificación administrativa e de apoio á

reactivación económica de Galicia, a Orde HFP/1030/2021, do 29 de setembro, pola que se configura o sistema de xestión do PRTR, a Orde HFP/1031/2021, do 29 de setembro, pola que se establece o procedemento e formato da información a proporcionar polas Entidades do Sector Público Estatal, Autonómico e Local para o seguimento do cumprimento de fitos e obxectivos e de execución orzamentaria e contable das medidas dos compoñentes do PRTR e o Regulamento (UE Euratom) 2024/2509 do Parlamento Europeo e do Consello, do 23 de setembro de 2024, sobre as normas financeiras aplicables ao orzamento xeral da Unión (Regulamento Financeiro).

CLÁUSULAS:

PRIMEIRA. *Obxecto*

O obxecto deste convenio é a concesión directa dunha subvención pública da Consellería de Política Social e Igualdade para financiar o desenvolvemento do Proxecto TEMPO DE ESCOITAR contra a soidade non desexada de AFALU que leva a cabo a dita entidade na provincia de Lugo no ano 2026.

Este proxecto ten como obxectivo a redución das situacións de soidade en persoas con 65 e máis anos, enfermos de Alzheimer e de deterioro cognitivo, no ámbito territorial da provincia de Lugo mediante a detección e intervención en ditas situacións. A actividade principal do proxecto será a posta en marcha dunha LINEA TELEFÓNICA orientada aos enfermos de alzheimer e outras enfermidades de deterioro cognitivo da provincia de Lugo.

O Proxecto TEMPO DE ESCOITAR contra a soidade non desexada desenvolve esta iniciativa na provincia de Lugo da Comunidade Autónoma de Galicia e descríbese no anexo II deste convenio.

SEGUNDA. *Beneficiarios do proxecto*

Serán beneficiarias do proxecto fundamentalmente, as persoas maiores de 65 anos enfermos de Alzheimer e de deterioro cognitivo, no ámbito territorial da provincia de Lugo. En particular, serán destinatarias da intervención prevista neste proxecto as seguintes persoas:

- Persoas con deterioro cognitivo.
- Persoas maiores con Alzheimer, en xeral.
- Persoas con Alzheimer que viven soas nos que os sentimentos de soidade poden acusarse.
- Persoas coidadoras de persoas en situación de dependencia con Alzheimer (nos que á

soidade xorde como consecuencia da sobrecarga do coidado).

TERCEIRA. *Actuacións subvencionables*

1. Serán subvencionables conforme a este convenio os gastos derivados do desenvolvemento e consolidación do Proxecto TEMPO DE ESCOITAR contra a soidade non desexada durante o ano 2026 por AFALU-no ámbito da Provincia de Lugo na Comunidade Autónoma de Galicia.

2. As actuacións a desenvolver estrutúranse en dous eixos operativos principais:

a) Como paso previo a posta en marcha do teléfono contra a soidade non desexada, a primeira actividade, coa finalidade de chegar ao maior número de beneficiarios posible, é unha CAMPAÑA DE DIVULGACIÓN do proxecto, que consiste, entre outras, das seguintes medidas:

-Cartelería.

-Contacto con Traballadores/as Sociais, de diferentes concellos, co fin de intentar chegar ao maior número de beneficiarios posible.

b) A actividade principal do proxecto será a posta en marcha dunha LINEA TELEFÓNICA (chamadas, WhatsApp), orientada a persoas maiores de 65 anos enfermos de alzheimer e outras enfermidades de deterioro cognitivo da provincia de Lugo, que funcionará entre as 9:00 e as 17:00 horas, de luns a venres, e que será atendido polos diferentes profesionais de Afalu (psicólogos, educadores sociais, traballadores sociais, monitores de ocio e tempo libres, auxiliares/xerocultores, mediadora comunicativa, terapeuta ocupacional .

Esta liña telefónica recibirá as chamadas, e deseñarase unha intervención individualizada de cada persoa que chame (realizado en conxunto de todo o equipo multidisciplinar de Afalu), para dar resposta ás necesidades que formule.

Esta intervención, adaptada e personalizada, contempla para cada persoa beneficiaria, maiores con Alzheimer:

- Avaliación do seu estado, tanto a nivel social, emocional e psicolóxico, para determinar o posible impacto da soidade non desexada no seu estado e establecer accións para minimizar as consecuencias detectadas. Esta avaliación realizarase en diferentes momentos durante a execución do proxecto, tendo principalmente, unha avaliación inicial (para determinar o punto de partida), e unha avaliación final (para coñecer o impacto do proxecto) . Para realizar esta avaliación os diferentes profesionais serviranse tanto de test estandarizados como de outros medios.

- Realización de chamadas e outros contactos, periódicos, de seguimento a cada persoa, coa

finalidade de establecer tempos de escoita e conversación, para coñecer cada certo tempo, como se atopa, novas necesidades formuladas, etc., e favorecer o contacto e interacción social con alguén aínda que non xurda ningunha nova demanda

- Como complementaria intervención psicolóxica individual (tanto a nivel presencial como telemático-videochamada), de ser o caso entre as persoas beneficiarios do proxecto , para facilitar orientación e apoio emocional, por trastornos emocionais ou psicolóxicos, tales como ansiedade, tristeza, depresión, etc.
- Creación, de ser o caso, e funcionamento, de xeito periódico, de reunións presenciais de beneficiarios do mesmo concello ou de concellos limítrofes, para favorecer a creación de lazos sociais e interaccións sociais entre beneficiarios.
- De ser o caso, talleres e actividades lúdicas de socialización, nos diferentes concellos nos que se prevé se desenvolverá o proxecto.
- De ser o caso, contacto e derivación a servizos especializados (sanitarios, sociais ou de outra índole) para dar resposta á necesidades formuladas polas persoas que chamen ao teléfono e que non poidan ser resoltas coa intervención directa do equipo técnico de Afalu.

CUARTA. *Compromisos da entidade beneficiaria*

1. En cumprimento do artigo 11 da Lei 9/2007, do 13 de xuño, de subvencións de Galicia e do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, son obrigas da entidade beneficiaria:

- a) Cumprir os requisitos sinalados no artigo 10 da Lei 9/2007, do 13 de xuño, e someterse ás actuacións de comprobación que a Consellería de Política Social e Igualdade a través da Dirección Xeral de Maiores e Atención Sociosanitaria poida requirirlle para a debida xustificación da axuda concedida e do cumprimento dos fins deste convenio, ás de control financeiro que corresponden á Intervención Xeral da Comunidade Autónoma en relación coas subvencións e axudas concedidas e ás previstas na lexislación do Tribunal de Contas e do Consello de Contas.
- b) Así mesmo, suxeitarase ao disposto nos artigos 11.c) da Lei 9/2007, do 13 de xuño, e 14.c) da Lei 38/2003, do 17 de decembro, xeral de subvencións, ademais de comprometerse ao cumprimento do resto das obrigas do artigo 11 da citada Lei 9/2007, do 13 de xuño.
- c) Cumprir todos e cada un dos obxectivos, actividades e proxectos, adoptar os comportamentos que fundamentaron a concesión da subvención e cumprir os

compromisos asumidos con motivo desta. Noutro caso, procederá o reintegro total ou parcial, atendendo aos criterios establecidos no convenio.

- d) Xustificar ante a Consellería de Política Social e Igualdade o cumprimento dos requisitos e das condicións, así como a realización da actividade e o cumprimento da finalidade que determinen a concesión da subvención.
- e) Someterse ás actuacións de comprobación, que efectuará a Consellería de Política Social e Igualdade, así como a calquera outra actuación de comprobación e control financeiro, que poidan realizar os órganos de control competentes, tanto autonómicos coma estatais ou comunitarios, para o que se achegará tanta información lle sexa requirida no exercicio das actuacións anteriores.
- f) Comunicarlle a Consellería de Política Social e Igualdade a obtención doutras subvencións, axudas, ingresos ou recursos para a mesma finalidade, procedentes de calquera administración ou entes públicos ou privados, nacionais, da Unión Europea ou de organismos internacionais, así como a modificación das circunstancias que fundamentasen a concesión da subvención do Mecanismo para a Recuperación e Resiliencia de data 27 de agosto de 2021. Esta comunicación deberá efectuarse no momento no que se coñeza e, en todo caso, con anterioridade á xustificación da aplicación dada aos fondos percibidos.
- g) Dispoñer dos libros contables, rexistros dilixenciados e demais documentos debidamente auditados nos termos esixidos pola lexislación mercantil e sectorial aplicable ao beneficiario en cada caso, así como cantos estados contables e rexistros específicos sexan esixidos polas bases establecidas neste convenio, coa finalidade de garantir o axeitado exercicio das facultades de comprobación e control.
- h) Conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de comprobación e control. Así mesmo, de conformidade co artigo 22.2.f) do Regulamento (UE) 2021/241, do 12 de febreiro, polo que se establece o Mecanismo de Recuperación e Resiliencia (en adiante MRR), é preceptiva a conservación da dita documentación durante un período de 5 anos a partir do pago do saldo, ou, a falta do devandito pagamento, da operación.
- i) Incluír na publicidade e en todo tipo de documentación e información relacionada coas actividades obxecto do proxecto e nos lugares onde estas se realicen: "Subvencionado

pola Xunta de Galicia – Consellería de Política Social e Igualdade”, co seu respectivo logotipo.

- j) Proceder ao reintegro dos fondos percibidos nos supostos previstos no artigo 33 da Lei 9/2007, do 13 de xuño, e artigo 74 e seguintes do Decreto 11/2009, do 8 de xaneiro.
- k) Cumprir a obriga de subministro de información nos termos establecidos no artigo 4 da Lei 1/2016, do 18 de xaneiro, de transparencia e bo goberno.
- l) Aceptar a cesión de datos ás Administracións Públicas implicadas nos termos indicados no Anexo III.
- m) Presentar a declaración responsable relativa ao cumprimento do cumprimento dos principios transversais establecidos no Plan de Recuperación, Transformación e Resiliencia (en adiante PRTR), nos termos indicados no Anexo IV.
- n) Etiquetado verde e dixital: En aplicación dos artigos 2.2.b) e 4 da Orde HFP/1030/2021, do 29 de setembro, pola que se configura o sistema de xestión do PRTR, deberán preverse medidas para cumprir o compromiso de etiquetado verde e dixital previsto (para cada compoñente) no PRTR, con base no Regulamento (UE) 2021/241, do 12 de febreiro, a liña C22.I2 inclúe a transformación tecnolóxica dos servizos sociais e as entidades do terceiro sector de acción social e a dixitalización das infraestruturas de protección residencial de nenos, nenas e adolescentes, en especial con necesidades especiais ou migrantes non acompañados. Aplicarase a esta actuación o campo de intervención 11, "Solucións de TIC para a Administración servizos electrónicos, aplicacións", cun coeficiente de 100%.
- o) A execución de conformidade coa exigencia do MRR do compromiso no cumprimento do principio horizontal de “non causar prexuízo significativo” que define o artigo 2.6) do Regulamento (UE) 2021/241, do 12 de febreiro, respecto dos 6 obxectivos medioambientais recollidos no artigo 5 da Orde HFP/1030/2021, do 29 de setembro, e definidos no Regulamento (UE) 2020/852 do Parlamento Europeo e do Consello de 18 de xuño de 2020 relativo ao establecemento dun marco para facilitar as inversións sostibles e polo que se modifica o Regulamento de taxonomía da UE. De acordo co dito compromiso, o compoñente 22, Inversión 2 do Plan de Recuperación, Transformación e Resiliencia establece que os equipos utilizados cumprarán cos requisitos de eficiencia de materiais establecidos de acordo co Regulamento (UE) 2024/1781 para servidores e almacenamento de datos, ou computadores e servidores de computadores ou

pantallas electrónicas. Os equipos non conterán as substancias restrinxidas enumeradas no anexo II da Directiva 2011/65/UE, excepto cando os valores de concentración en peso en materiais homoxéneos non superen os enumerados no dito anexo. Ao final da súa vida útil, o equipo someterase a unha preparación para operacións de reutilización, recuperación ou reciclaxe, ou un tratamento adecuado, incluída a eliminación de todos os fluídos e un tratamento selectivo de acordo co Anexo VII da Directiva 2012/19/UE.

- p) Manter rexistros contables independentes ou empregar códigos de contabilidade apropiados para todas as transaccións relacionadas co proxecto, sen prexuízo das normas xerais da contabilidade, que permita seguir unha pista de auditoría suficiente sobre os gastos financiados cos fondos da Unión Europea – NEXTGENERATION EU.
- q) Desenvolver o proxecto tendo en conta a lexislación vixente en materia de benestar e atención das persoas maiores en aplicación da Lei 13/2008, do 3 de decembro, de servizos sociais de Galicia e da Lei 39/2006, do 14 de decembro Promoción da Autonomía Persoal e Atención ás persoas en situación de dependencia.
- r) Conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de comprobación e control.

2. A realización das actuacións a subvencionar que forman parte do proxecto da entidade axustarase as seguintes premisas :

- a) Realizar todas as actividades de difusión, e acompañamento descritas na cláusula terceira, dende a posición especializada que lle da AFALU en Galicia a súa perspectiva como entidade con longa experiencia no servizo e asistencia a persoas maiores no ámbito da teleasistencia, na axuda no fogar e na creación de redes sociais de atención a persoas en proceso de envellecemento ou con funcións cognitivas deterioradas.
- b) Adaptar o desenvolvemento das actividades a cada situación que se presente cos medios técnicos e tecnolóxicos precisos para o desenvolvemento presencial e non presencial do proxecto.
- c) Desenvolver o proxecto tendo en conta a lexislación vixente en materia de promoción da autonomía persoal, de promoción do envellecemento activo así como a primacía do superior interese da persoa maior ou discapacitada sobre calquera outro.
- d) Levar a cabo a avaliación de resultados trala finalización do proxecto, mediante a

elaboración da memoria final.

- e) Elaborar, dentro do mes seguinte á finalización do proxecto, unha memoria xustificativa na que se recollerán, entre outros, os seguintes aspectos: actividades realizadas, recursos empregados, datos estatísticos, valoración global e propostas de mellora.
- f) Asegurarse do mantemento do control de calidade en todas as fases de execución do proxecto.
- g) Non percibir remuneración ningunha por parte das persoas usuarias do proxecto.

QUINTA. Persoal para o desenvolvemento do proxecto

Para o desenvolvemento do proxecto a AFALU dispón de persoal especializado nesta área de actuación.

O persoal que AFALU pon a disposición deste proxecto en ningún caso poderá actuar baixo a dependencia da Consellería de Política Social e Igualdade, debendo ser a citada entidade a que imparta as oportunas ordes aos seus traballadores e a que ostente respecto destes o correspondente poder de dirección, conservando os dereitos, obrigas, riscos e responsabilidades inherentes a súa condición de empregador.

A formalización do presente convenio non implicará relación laboral ou de calquera outra natureza entre as persoas que o desenvolvan e a Consellería de Política Social e Igualdade, polo que non se lle poderá esixir a esta, responsabilidade ningunha por estes conceptos, nin directa nin subsidiaria.

SEXTA. Condicións económicas

1. O importe integro do proxecto ascende a cento cincuenta mil euros (150.000 €). A Consellería de Política Social e Igualdade financiará o importe íntegro do proxecto aboando os gastos derivados da súa execución con cargo a fondos procedentes do MRR, no marco do PRTR – Financiado pola Unión Europea – Next Generation EU, segundo o Convenio de colaboración asinado con data 27 de agosto de 2021 entre o entón Ministerio de Derechos Sociales y Agenda 2030 e a Comunidade Autónoma de Galicia para a execución de proxectos con cargo aos fondos europeos procedentes do Mecanismo para a Recuperación e Resiliencia e publicado no Boletín Oficial del Estado núm. 230 do 25.09.2021. con cargo á aplicación orzamentaria 08.05.312D.480.1 e proxecto 2022-00122 na que existe crédito axeitado e suficiente para este fin.

O Imposto do Valor Engadido (IVE) correspondente aos gastos derivados da execución da actuación terá a consideración de gasto subvencionable unicamente cando sexa efectivamente soportado por AFALU e non sexa susceptible de recuperación nin de compensación, conforme á normativa tributaria aplicable. No caso de que o IVE sexa recuperable ou compensable, non terá a consideración de gasto elixible e, en consecuencia, non poderá financiarse con cargo aos fondos procedentes do MRR.

A subvención límitase ao financiamento dos gastos que aparecen desagregados no Anexo I e en ningún caso supón beneficio económico para a entidade conveniente. Non obstante, poderanse admitir variacións no importe de cada unha das partidas sinaladas, sempre que a cantidade total achegada non varíe.

2. Respecto ao pagamento e forma de xustificación da subvención estarase ao disposto na Lei 38/2003, do 17 de novembro; no Real decreto 887/2006, do 21 de xullo, na Lei 9/2007, do 13 de xuño, e no Decreto 11/2009, do 8 de xaneiro. O libramento farase nunha conta corrente da que sexa titular a entidade beneficiaria nas seguintes condicións:

a) Tras a sinatura do presente convenio poderán realizarse pagamentos parciais a conta, ata un máximo de 120.000 € (80% da cantidade subvencionada), do seguinte xeito:

1º. A cantidade de 27.600 € (80% dos 18.000 primeiros euros máis o 10% dos 132.000 € restantes), será satisfeita no intre no que se asine o convenio con AFALU co obxecto de que se poidan cubrir custos por gastos inmediatos para a posta en marcha do proxecto. O emprego desta cantidade xustificarase mediante as correspondentes facturas antes do derradeiro pagamento.

A este respecto, esta entidade queda exonerada de constituír as garantías a que fan referencia os artigos 62.3 e 67 do Decreto 11/2009, do 8 de xaneiro, por tratarse dunha entidade das características determinadas no artigo 65.4 f) do dito Decreto.

2º. Ata 120.000 € pagaranse a medida que se xustifique a actividade descrita no proxecto a subvencionar a través deste convenio, de conformidade co Anexo II.

b) A cantidade de 30.000 € restantes (20% da cantidade subvencionada), pagaranse unha vez xustificada a realización da totalidade da actividade subvencionada.

SÉTIMA. Xustificación e control

A actividade e os gastos que poidan ser subvencionables, deben xustificarse de conformidade ao previsto no Decreto 11/2009, do 8 de xaneiro. A tal efecto a AFALU debe presentar:

a) Unha memoria de actuación xustificativa do cumprimento das condicións impostas na concesión da subvención, coa indicación das actividades realizadas e dos resultados obtidos e que debe incluír os seguintes apartados:

1º. Xustificación do gasto, segundo o artigo 28 da Lei 9/2007, de 13 de xuño, correspondente ás actuacións realizadas e aos gastos efectuados no período comprendido entre o 1 de xaneiro e o 30 de xuño de 2026. A documentación xustificativa deberá presentarse, como data límite, o 10 de xullo de 2026.

2º. Actividades realizadas.

3º. Recursos económicos, materiais e de persoal empregados.

4º. Valoración global.

5º. Accións de innovación e investigación.

b) Unha memoria económica xustificativa do custo das actividades realizadas, que conterá:

1º. Unha relación clasificada dos gastos e inversións da actividade, coa identificación da persoa acreedora e do documento, o importe, a data de emisión e, no seu caso, data do pago.

2º. As facturas ou documentos de valor probatorio equivalente no tráfico xurídico-mercantil ou con eficacia administrativa incorporados na relación á que se fai referencia no apartado anterior á documentación acreditativa do pago.

3º. Os documentos acreditativos dos gastos realizados con medios ou recursos propios e a indicación, no seu caso, dos criterios de reparto dos custos xerais e/ou indirectos incorporados na relación a que se fai referencia na letra a) , agás naqueles casos nos que as bases reguladoras da subvención teñan previsto a súa compensación mediante un tanto alzado sen necesidade de xustificación.

4º. Os tres orzamentos que, en aplicación do art. 29.3º da Lei 9/2007, do 13 de xuño, deba solicitar a entidade beneficiaria cando o importe do gasto subvencionable supere a contía de 15.000 euros no suposto de subministración de bens de equipo ou prestación de servizos por empresas de consultaría ou asistencia técnica, de diferentes provedores con carácter previo á contratación do compromiso para a prestación do servizo ou a entrega do ben, salvo que polas especiais características dos gastos subvencionables non exista no mercado suficiente número de entidades que o subministren ou presten, ou que o gasto se realizase con anterioridade á

sinatura do convenio e dentro do período que abrangue este.

A elección entre as ofertas presentadas, realizarase de conformidade con criterios de eficiencia e economía, e a elección deberá xustificarse expresamente nunha memoria cando non recaia na proposta económica máis vantaxosa.

c) En canto aos custos salariais das persoas traballadoras que participan no proxecto, AFALU deberá presentar, referida á mensuralidade ou mensuralidades polas que se solicita, a seguinte documentación:

1º Relación nominal dos/das traballadores/as que se inclúen como xustificación do proxecto subvencionado.

2º Recibos de salarios.

3º Documentos 'Relación de liquidación de cotizacións' (RLC) e 'Relación Nominal de Traballadores' (RN) dos traballadores/as correspondentes aos meses imputados.

4º Impresos de liquidación nominal do IRPF (modelos 111 e 190).

Todos os documentos anteriores deberán ir acompañados polo xustificante da transferencia ou cargo bancario correspondente que acredite a realización do seu pago.

A cantidade a imputar á actividade subvencionada será do 100% do gasto do persoal técnico, cando este dedica o total da xornada a desempeñar tarefas das actuacións subvencionadas; no caso de dedicación inferior á xornada contratada, o gasto imputado será proporcional á súa dedicación á realización destas actuacións. A tal efecto se non se atopase diferenciado na nómina e nesta se inclúen outros conceptos retributivos, achegarase un cálculo xustificativo da imputación efectuada segundo o criterio de horas da actuación realizada en relación co total de horas traballadas.

A subvención cubre os gastos salariais e de Seguridade Social, polo que as liquidacións, complementos extrasalariais ou indemnización de fin de contrato non se poden imputar.

Tampouco serán subvencionables, as vacacións pagadas, pero non disfrutadas, nin as horas extras ou traballos realizados fóra da xornada habitual de traballo.

Nas baixas por IT e nos permisos por nacemento de fillos:

- No caso de substitución da persoa traballadora titular subvencionaranse os custos que ocasiona a persoa traballadora que a substitúa.
- No caso de que non se substitúa á persoa traballadora titular, o importe non usado

deberá reintegrarse na súa totalidade excepto a liquidación das pagas extras cando o convenio colectivo de aplicación recolla para este suposto a obrigatoriedade do seu pagamento.

d) En canto á xustificación do cumprimento de estar ao corrente das súas obrigas tributarias e fronte á Seguridade Social e para cumprir coa obriga da identificación do perceptor final prevista no artigo 8, apartado 2, da Orde HFP/1030/2021, a Consellería de Política Social e Igualdade, a través da dirección xeral con competencias en materia de maiores e atención sociosanitaria poderá consultar a través dos medios electrónicos dispoñibles os datos incluídos nos documentos que a continuación se indican elaborados polas administracións públicas agás oposición expresa de AFALU, en cuxo caso deberá aportar a documentación acreditativa do cumprimento da dita obriga para o outorgamento da subvención:

- NIF da entidade.
- DNI ou NIE da persoa representante.
- Domicilio fiscal da persoa xurídica.
- Certificado sobre cumprimento das obrigas tributarias coa Agencia Estatal de la Administración Tributaria.
- Certificado sobre o cumprimento das obrigas coa Seguridade Social.
- Certificado sobre cumprimento das obrigas tributarias coa Administración pública da Comunidade Autónoma de Galicia.
- Inscripción no Censo de empresarios, profesionais e retedores da Axencia Estatal de Administración Tributaria.

No caso da imposibilidade da obtención dos citados datos poderase solicitar á AFALU a presentación dos documentos correspondentes.

Certificado ou declaración responsable que xustifique que os equipos utilizados cumprirán cos requisitos de eficiencia de materiais establecidos de acordo co Regulamento (UE) 2024/1781 e que non conterán as substancias restrinxidas enumeradas no anexo II da Directiva 2011/65/UE, excepto cando os valores de concentración en peso en materiais homoxéneos non superen os numerados no dito anexo. Ademais, aportará o compromiso de que ao final da súa vida útil, os equipos se someterán a unha preparación para operacións de reemprego, recuperación ou reciclaxe, ou un tratamento adecuado, incluída a eliminación de todos os fluídos e un tratamento selectivo de acordo co Anexo VII da Directiva 2012/19/UE. Estes aspectos están

incluídos nas medidas de cumprimento do principio DNSH.

A xustificación comprenderá os gastos realizados e pagados entre o 1 de xaneiro de 2026 e o 30 de xuño de 2026, e deberá presentarse na Consellería de Política Social e Igualdade, a través da dirección xeral con competencias en materia de maiores e atención sociosanitaria con data límite 10 de xullo de 2026.

AFALU comprométese a presentar, no momento da xustificación da subvención, todos os xustificantes de pagamento correspondentes aos gastos realizados no marco do proxecto. En particular, deberá achegar a documentación acreditativa dos custos salariais e das cotizacións á Seguridade Social correspondentes ao período de execución comprendido entre o 1 de xaneiro e o 30 de xuño de 2026.

AFALU, no momento da xustificación da execución total do proxecto e, en calquera caso, antes do derradeiro pagamento, presentará unha declaración de todas as axudas solicitadas para este mesmo proxecto, tanto aprobadas ou concedidas como as pendentes de resolución, das distintas Administracións Públicas competentes ou das súas entidades vinculadas ou dependentes.

OITAVA. Fraude, corrupción e conflito de intereses

En cumprimento do establecido no artigo 6 da Orde HFP/1030/2021, do 29 de setembro, pola que se configura o sistema de xestión do Plan de Recuperación, Transformación e Resiliencia, estableceranse mecanismos para a prevención, detección, corrección e persecución da fraude, a corrupción e o conflito de intereses.

Calquera persoa que teña coñecemento de feitos que puidesen ser constitutivos de fraude ou irregularidade, en relación con actuacións financiadas total ou parcialmente con cargo a fondos procedentes da Unión Europea no marco deste convenio, poderá poñer os ditos feitos en coñecemento do Servizo Nacional de Coordinación Antifraude (SNCA) da Intervención Xeral do Estado, nos termos establecidos na Comunicación 1/2017, do 6 de abril, do citado servizo, a través da canle habilitada na web:
<https://www.igae.pap.hacienda.gob.es/sitios/igae/es-ES/Paginas/denan.aspx>

Así mesmo, a Xunta de Galicia pon a disposición da cidadanía unha canle de denuncias sobre irregularidades ou condutas de fraude, que terá a súa sede no Sistema Integrado de Atención a Cidadanía (SIACI). A ligazón á canle de denuncias é a seguinte:
[-https://transparencia.xunta.gal/canle-de-denuncias](https://transparencia.xunta.gal/canle-de-denuncias)

Estas canles garanten o anonimato da persoa denunciante.

Así mesmo, serán de aplicación ás actuacións deste convenio as medidas contempladas no Plan xeral de prevención de riscos de xestión e medidas antifraude da Xunta de Galicia e no Plan específico de prevención de Riscos de Xestión e Medidas Antifraude da Consellería de Política Social e Igualdade, que se atopen vixentes.

-<https://ficheiros-web.xunta.gal/transparencia/codigo-etico/plan-prevencion-riscos-medidas-antifraude-gal.pdf>

-<https://ficheiros-web.xunta.gal/transparencia/plans/antifraude/plan-antifraude-politica-social-gal.pdf>

Ao tratarse dun convenio con beneficiario determinado xa coñecido aplícase o réxime xeral de conflito de intereses da Orde HFP 1030/2021.

Non obstante, os procedementos de concesión de subvencións, que se poidan levar a cabo en virtude deste convenio, estará sometido á análise sistemática do risco de conflito de interese que regulan a Disposición adicional 112ª da Lei 31/2022, do 23 de decembro, de orzamentos xerais do Estado para o ano 2023 e a Orde HFP/55/2023, do 24 de xaneiro, relativa ao análise sistemática do risco de conflito de interese nos procedementos que executan o Plan de Recuperación, Transformación e Resiliencia. A normativa reguladora da subvención vencellados ao PRTR deberán recoller unha cláusula do seguinte teor: **ANÁLISE SISTEMÁTICA DO RISCO DE CONFLITO DE INTERESE NOS PROCEDEMENTOS DE SUBVENCIÓN QUE EXECUTAN O PRTR.**

Este procedemento de subvención está suxeito a análise sistemática e automatizada do risco de conflito de interese prevista na disposición adicional centésima décima segunda da Lei 31/2022, de 23 de decembro, e na Orde HFP/55/2023, de 24 de xaneiro, relativa á análise sistemática do risco de conflito de interese nos procedementos que executan o Plan de Recuperación, Transformación e Resiliencia.

De acordo co establecido no artigo 7 da Orde HFP/55/2023, de 24 de xaneiro, o órgano competente para a concesión da subvención), poderá solicitar aos solicitantes da axuda) a información da súa titularidade real cando a AEAT non dispoña desa información e así o indicase mediante a correspondente bandeira negra, tendo en conta a análise realizada a través da aplicación de análise do risco de conflito de interese MINERVA. Este suposto non implicará a suspensión automática do procedemento en curso, pero a dita información deberá aportarse ao ao órgano que concede a subvención) no prazo de 5 días hábiles desde que se

formule a solicitude de información. A falta desta información no prazo sinalado será motivo de exclusión do procedemento.

Os datos, unha vez recibidos, serán adecuadamente custodiados de acordo co Regulamento (UE) 2016/679 do Parlamento Europeo e do Consello, de 27 de abril de 2016 (Regulamento xeral de protección de datos), e coa Lei Orgánica 3/2018, de 5 de decembro, de protección de datos persoais e garantía dos dereitos dixitais. A través da aplicación MINERVA, o responsable de operación levará a cabo un novo control ex ante do risco de conflito de interese, indicando, en lugar do solicitante da axuda), os titulares reais recuperados polo polo órgano competente para a contratación (ou polo órgano competente para a concesión da subvención).

NOVENA. Compatibilidade

Estas axudas son compatibles con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais da Unión Europea ou de organismos internacionais.

O importe da subvención en ningún caso poderá ser de tal contía que, illadamente ou en concorrencia con subvencións ou axudas doutras administracións públicas ou doutros entes públicos ou privados, nacionais ou internacionais, supere o custo total da actividade que vai desenvolver o beneficiario da subvención.

O Regulamento financeiro da Unión Europea e o Regulamento do MRR amparan a complementariedade dos distintos fondos e prohiben o dobre financiamento dos mesmos gastos. En particular, o artigo 9 do Regulamento (UE) 2021/241 establece que as reformas e investimentos financiados co MRR poderán recibir axuda doutros programas e instrumentos da Unión, sempre que a dita axuda non cubra o mesmo custo. A prevención do dobre financiamento eríxese, por tanto, nun principio transversal de obrigatoria consideración na execución do PRTR:

DÉCIMA. Información básica sobre protección de datos persoais

As partes asinantes deste convenio garantirán a confidencialidade dos datos persoais aos que teñan acceso como consecuencia das actuacións realizadas en execución deste e de conformidade co disposto na Lei orgánica 3/2018, de 5 de decembro, de protección de datos persoais e garantía dos dereitos dixitais e no Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e a libre circulación de estes datos e polo que se derroga a Directiva 95/46/CE (Regulamento xeral de protección de datos).

Os datos persoais recadados neste procedemento serán tratados na súa condición de responsable pola Xunta de Galicia-Consellería de Política Social e Igualdade coa finalidade de levar a cabo a tramitación administrativa derivada da xestión da concesión directa a través deste convenio que comprende verificar os datos e documentos que a entidade interesada achegue para comprobar a exactitude destes, levar a cabo as actuacións administrativas que se deriven e informar sobre o estado de tramitación.

O tratamento dos datos baséase no cumprimento dunha misión de interese público ou no exercicio de poderes públicos, conforme ás referencias recollidas no enlace <https://www.xunta.gal/información-xeral-proteccion-datos> derivada dunha competencia legalmente atribuída ao responsable do tratamento, así como o cumprimento das obrigas legais impostas ao dito responsable de conformidade co disposto no artigo 6.1, letras c) e e) do Regulamento (UE) 2016/679 do Parlamento Europeo e do Consello, do 27 de abril de 2016 e o artigo 8 da Lei orgánica 3/2018, do 5 de decembro, e en concreto a competencia e obrigas previstas nos preceptos básicos da Lei 38/2003, do 17 de novembro, da Lei 9/2007, do 13 de xuño, na Lei 39/2015, do 1 de outubro, na Lei 1/2016, do 18 de xaneiro e na Lei 4/2019, do 17 de xullo, de administración dixital de Galicia. Con todo, determinados tratamentos poderán fundamentarse no consentimento das persoas interesadas, reflectíndose esta circunstancia de conformidade coa normativa de aplicación.

A referencia a publicidade, en cumprimento da normativa de transparencia e subvencións, axustarase a dita normativa e coas limitación que esta establece.

Como destinatarios os datos serán comunicados ás administracións públicas no exercicio das súas competencias, cando sexa necesario para a tramitación e resolución dos seus procedementos ou para que os cidadáns poidan acceder de forma integral á información relativa a unha materia.

As persoas interesadas poderán solicitar o acceso, rectificación, oposición, limitación, portabilidade e supresión dos seus datos ou retirar, no seu caso, o consentimento outorgado a través da sede electrónica da Xunta de Galicia, ou nos lugares e rexistros establecidos na normativa reguladora do procedemento administrativo común, segundo se recolle en <https://www.xunta.gal/exercicio-de-dereitos>. O contacto coa persoa delegada de protección de datos e máis información consultarase no enlace <https://www.xunta.gal/proteccion-datos-persoais>.

Asociación de Familiares de Enfermos de Alzheimer e outras Demencias de Lugo AFALU será responsable do tratamento dos datos e dos consentimentos das persoas interesadas de

acordo co Regulamento (UE) 2016/679 do Parlamento Europeo e do Consello de 27 de abril de 2016 e a Lei Orgánica 3/2018, do 5 de decembro, tratará os datos coas finalidades e os usos exclusivamente precisos para a execución do proxecto subvencionado a través deste convenio, polo que non poderán ser usados para un fin distinto. Os datos persoais aos que teña acceso non serán comunicados a terceiros, nin sequera para a súa conservación.

As partes asinantes deste convenio garantirán a confidencialidade dos datos persoais aos que teñan acceso e de conformidade co disposto na Lei orgánica 3/2018, de 5 de decembro, de protección de datos persoais e garantía dos dereitos dixitais e no Regulamento (UE) 2016/679, do Parlamento Europeo e do Consello de 27 de abril de 2016.

A entidade esixiralle, tanto ao persoal propio como a aquel persoal voluntario que participe no proxecto, un compromiso de confidencialidade sobre aqueles datos aos que teñan acceso pola súa participación no proxecto.

DÉCIMO PRIMEIRA. Comisión mixta de seguimento

Para o seguimento e coordinación das accións previstas no presente convenio creárase unha comisión mixta e paritaria na que estarán representadas as partes asinantes. Esta comisión, que se reunirá por petición de calquera das partes, será o mecanismo de actuación conxunta para o seguimento e avaliación das actuacións a subvencionar a través do presente convenio. Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativas á subvención concedida, serán resoltas pola conselleira de Política Social e Igualdade.

A Comisión estará formada por dúas persoas representantes da Consellería de Política Social e Igualdade e dúas persoas representantes de AFALU designadas polas persoas que representen a cada unha das partes, así como os seus suplentes.

A persoa que ocupe a presidencia será unha das persoas representantes da Administración designada pola persoa titular da dirección xeral con competencias en materia de maiores e atención sociosanitaria.

A persoa que ocupe a secretaría, así como a que asuma a súa suplencia, será unha persoa adscrita á dirección xeral con competencias en materia de maiores e atención sociosanitaria designada pola persoa titular da Presidencia, que actuará con voz pero sen voto.

Como órgano colexiado a comisión someterase ás cláusulas do presente convenio e ao réxime establecido na Lei 40/2015, do 1 de outubro, do réxime xurídico do sector público, e na Lei

16/2010, do 17 de decembro, de organización e funcionamento da Administración xeral e do sector público autonómico de Galicia.

DÉCIMO SEGUNDA. Vixencia

O presente convenio producirá efectos desde a data da súa sinatura e manterá a súa vixencia ata o 10 de xullo de 2026.

O período de execución das actuacións subvencionables abranguerá desde o 1 de xaneiro de 2026 ata o 30 de xuño de 2026.

DÉCIMO TERCEIRA. Modificacións

Toda alteración das condicións tidas en conta para a concesión da subvención, e en todo caso a obtención concorrente doutras achegas fóra dos casos permitidos nas normas reguladoras, poderá dar lugar á modificación da presente concesión, nos termos establecidos na normativa reguladora da subvención.

DÉCIMO CUARTA. Natureza xurídica e cuestións litixiosas

O presente convenio terá carácter administrativo rexéndose nos seus efectos polo establecido nas súas cláusulas, polo disposto na Lei 38/2003, do 17 de novembro, e no Real decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións; na Lei 9/2007, do 13 de xuño e no Decreto 11/2009, do 8 de xaneiro. No seu defecto, para resolver as lagoas e dúbidas que puideran presentarse, rexerase polo establecido na Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro do 2014, así como pola Lei 40/2015, de 1 de outubro, de Réxime Xurídico do Sector Público.

Con respecto á financiamento con fondos europeos rexerase polo Regulamento (UE) 2020/2094 do Consello de 14 de decembro de 2020 polo que se establece un instrumento de Recuperación da Unión Europea para apoiar a recuperación tras a crise da COVID-19, o Regulamento (UE) 2021/241 do Parlamento Europeo e do Consello de 12 de febreiro de 2021 polo que se establece o Mecanismo de Recuperación e Resiliencia, o Real Decreto-lei 36/2020, de 30 de decembro, polo que se aproban medidas urxentes para a modernización da Administración Pública e para a execución do Plan de Recuperación, Transformación e Resiliencia, o Plan de Recuperación, Transformación e Resiliencia de España aprobado na data 16/06/2021 pola Decisión de Execución do Consello, a Lei 9/2021, de 25 de febreiro, de

simplificación administrativa e de apoio á reactivación económica de Galicia, a Orde HFP/1030/2021, de 29 de setembro, pola que se configura o sistema de xestión do Plan de Recuperación, Transformación e Resiliencia, a Orde HFP/1031/2021, de 29 de setembro, pola que se establece o procedemento e formato da información a proporcionar polas Entidades do Sector Público Estatal, Autonómico e Local para o seguimento do cumprimento de fitos e obxectivos e de execución orzamentaria e contable das medidas dos compoñentes do Plan de Recuperación, Transformación e Resiliencia, e o Regulamento (UE, Euratom) 2024/2509 do Parlamento Europeo e do Consello, do 23 de setembro de 2024, sobre as normas financeiras aplicables ao orzamento xeral da Unión (Regulamento Financeiro).

Segundo establece o artigo 22.2.e) do Regulamento (UE) 2021/241 do Parlamento Europeo e do Consello de 12 de febreiro de 2021 polo que se establece o Mecanismo de Recuperación e Resiliencia, as partes que interveñen neste convenio están sometidas ás actuacións de control que poida exercer a Comisión Europea, a Oficina Europea de Loita contra a fraude (OLAF), o Tribunal de Contas Europeo e, cando proceda, á Fiscalía Europea.

As cuestións litixiosas xurdidas acerca da interpretación, modificación e resolución serán resoltas pola Consellería de Política Social e Igualdade poñendo os seus acordos fin á vía administrativa. Contra elas cabe recurso potestativo de reposición ante o mesmo órgano que ditou a resolución, segundo o previsto no artigo 124 da Lei 39/2015, do 1 de outubro, do procedemento administrativo común das administracións públicas, no prazo dun mes se a resolución fose expresa. Se o acto non fora expreso, poderá interpor recurso de reposición en calquera momento a partir do día seguinte a aquel en que se produza o acto presunto, ou poderá interpoñer directamente recurso contencioso-administrativo, no prazo de dous meses contados desde o día seguinte á notificación do acto que poña fin á vía administrativa, se este fose expreso. Se non o fose, o prazo será de seis meses e contarase, para o solicitante e outros posibles interesados, a partir do día seguinte a aquel en que, de acordo coa súa normativa específica, se produza o acto presunto, de conformidade co disposto na Lei 29/1998, do 13 de xullo, reguladora da xurisdición contencioso-administrativa.

Para tales efectos o tribunal competente será o Tribunal Superior de Xustiza de Galicia.

DÉCIMO QUINTA. Causas de resolución e efectos da mesma

Serán causas de resolución do presente convenio:

- a) Incumprimento total ou parcial de calquera das cláusulas que o regulan.
- b) Pola aplicación dos fondos percibidos a fins distintos dos que motivaron a súa

concesión.

- c) Polo transcurso do tempo fixado sen que se execute a inversión obxecto da subvención.
- d) As establecidas nos artigos 32 e 33 da Lei 9/2007, do 13 de xuño, procedendo, se fose o caso, o reintegro total ou parcial da axuda percibida e dos xuros de mora devindicados dende o momento do seu pagamento ata a data na que se acorde a procedencia do reintegro.

De resolverse o convenio, a Consellería de Política Social e Igualdade, poderá exixir á entidade o reintegro das cantidades achegadas. Igualmente, de conformidade co disposto no artigo 17.3 da Lei 9/2007, do 13 de xuño, procederá ao reintegro do exceso percibido no suposto de que o importe da axuda, illado ou en concorrencia con outras subvencións, axudas, ingresos ou recursos supere o custo da actividade subvencionada.

En canto aos efectos estarase ao establecido no artigo 52 da citada Lei 40/2015, do 1 de outubro.

DÉCIMO SEXTA. Comunicación, divulgación e publicidade

O presente convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, e no Decreto 126/2006, do 20 de xullo, polo que se regula o rexistro de convenios da Xunta de Galicia.

Así mesmo, será obxecto de publicación e inscrición en cumprimento do disposto no artigo 17 da Lei 1/2016, do 18 de xaneiro, o artigo 15 da Lei 9/2007, do 13 de xuño, e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.

As partes asinantes autorizan a publicidade dos seus datos persoais e demais especificacións recollidas no presente convenio no Portal de Transparencia e Goberno Aberto.

De conformidade coa Lei 38/2003, do 17 de novembro, o instrumento de colaboración e a información sobre a subvención serán comunicados á Base de Datos Nacional de Subvencións.

Segundo a cláusula novena da Resolución de 11 de setembro de 2021, da Secretaría de Estado de Dereitos Sociais, pola que se publica o Convenio coa Comunidade Autónoma de Galicia, para a execución de proxectos con cargo aos fondos europeos procedentes do MRR os asinantes comprométense a destacar, en cantas actividades realicen para a difusión das

accións previstas no presente Convenio, o financiamento efectuado pola Administración Xeral do Estado, así como facelo constar en cuantos materiais se reproduzan e utilicen para a difusión ou publicidade do convenio financiado, de acordo co establecido no «Manual de imaxe Institucional da Administración Xeral do Estado».

Adicionalmente, os asinantes farán mención da orixe deste financiamento e velarase por darlle visibilidade, mediante o emblema da Unión e unha declaración de financiamento adecuado que indique «financiado pola Unión Europea-NextGenerationEU», en particular cando promovan as accións e os seus resultados, facilitando información coherente, efectiva e proporcionada dirixida a múltiples destinatarios, incluídos os medios de comunicación e o público. Esta publicidade realizarase de conformidade co establecido no artigo 34.2 do Regulamento (UE) 2021/241, do 12 de febreiro, e conforme ao establecido no Manual de Marca do PRTR confeccionado pola Secretaría de Estado de Comunicación.

Deberá cumprirse tamén co establecido en materia de comunicación, información e publicidade na Orde HFP/1030/2021, do 29 de setembro, pola que se configura o sistema de xestión do Plan de Recuperación, Transformación e Resiliencia, en especial co previsto no seu artigo 9. En particular, compre ter en conta a información recollida no apartado de identidade visual da web do Plan de Recuperación, Transformación e Resiliencia <https://planderecuperacion.gob.es/identidad-visual> e o Manual de comunicación para xestores e beneficiarios do Plan de Recuperación, Transformación e Resiliencia, da Secretaría General de Fondos Europeos do Ministerio de Hacienda, dispoñible na seguinte ligazón:

-<https://www.fondoseuropeos.hacienda.gob.es/sitios/dgpmrr/es-es/Documents/MANUAL%20DE%20COMUNICACION%20PARA%20LOS%20GESTORES%20DEL%20PLAN.pdf>

E, en proba de conformidade cos termos do convenio, as partes comparecentes asinan o presente convenio no lugar e data da sinatura dixital.

Pola Consellería de Política Social e
Igualdade

Pola Asociación de Familiares de Enfermos
de Alzheimer e outras Demencias de Lugo
(AFALU)

Fabiola García Martínez

María del Carmen Pena Ledo

ANEXO I

Cadro económico

Orzamento desagregado por tipoloxía de actuación

1.1 CADRO XERAL

Tipoloxía de actuación	Tipoloxía de gasto/gastos subvencionables	Importe ano 2026
Centro Multicanle telefonico de Acompañamento na Soidade	Gastos de persoal destinados á atención telefonica, acompañamento psicosocial e seguimento das persoas usuarias do servizo	132.077,81 €
	Subministracións e servizos destinados a accións de sensibilización, difusión e desenrolo, formación e apoio do proxecto	17.922,19 €
TOTAL		150.000 €

1.2 DETALLE DO CADRO DE PERSOAL

Categoría profesional	Grupo	Salario	Seguridad social	Meses	% Imputado	Total
Psicologa	1	1.341,91 €	434,78 €	6	100%	10.660,14 €
Director-Psicologo	1	5.017,96 €	916,14 €	6	73%	25.991,36 €
Psicologa	1	2.173,20 €	698,70 €	6	53%	9.132,64 €
Coordinadora	2	2.482,80 €	798,24 €	6	100%	19.686,24 €
T. Ocupacional	2	872,26 €	290,90 €	4	100%	4.652,64 €
T. Social	2	1.434,69 €	461,26 €	6	60%	6.825,42 €
Educ. Social	2	1.346,64 €	436,31 €	6	56%	5.990,71 €
Educ. Social	2	1.871,69 €	601,74 €	6	50%	7.420,29 €
T. Social	2	1.819,22 €	584,87 €	6	48%	6.923,78 €
Monitora	4	1.424,50 €	478,63 €	6	58%	6.622,89 €
Administrativa	5	2.074,67 €	667,00 €	6	30%	4.935,01 €

Categoría profesional	Grupo	Salario	Seguridad social	Meses	% Imputado	Total
Gerocultora	6	1.444,77 €	464,50 €	6	100%	11.455,62 €
Gerocultora	6	1.115,63 €	358,68 €	6	80%	7.076,69 €
Gerocultora	6	741,65 €	238,43 €	6	80%	4.704,38 €
TOTAL						132.077,81

1.3 Detalle de subministracións e servizos

Partida de gasto	Total	Meses	% Imputado	TOTAL
Alquiler	15.275,04 €	6	85,00 %	12.983,78 €
Auditoria	700 €	1	100,00 %	700,00 €
Agua	1837,38 €	6	20,00 %	367,48 €
Telefono	1641,48 €	6	85,00 %	1.395,26 €
Gas	2520,00 €	6	20,00 %	504,00 €
Luz	6.600,00 €	6	30,00 %	1971,67 €
TOTAL				17.922,19 €

ANEXO II. PROXECTO

I. Descrición do proxecto

O Proxecto TEMPO DE ESCOITAR contra a soidade non desexada ten como finalidade contribuír á detección temperá e á redución das situacións de soidade non desexada en persoas maiores de 65 anos, enfermos de Alzheimer e de deterioro cognitivo, no ámbito territorial da provincia de Lugo da Comunidade Autónoma de Galicia.

O proxecto desenvolverase ao longo do ano 2026 e estrutúrase arredor de dous compoñentes principais:

a) Como paso previo a posta en marcha do teléfono contra a soidade non desexada, a primeira actividade, coa finalidade de chegar ao maior número de beneficiarios posible, é unha CAMPAÑA DE DIVULGACIÓN do proxecto, que consiste, entre outras, das seguintes medidas:

- Cartelería.

- Contacto con Traballadores/as Sociais, de diferentes concellos, co fin de intentar chegar ao maior número de beneficiarios posible.

b) A actividade principal do proxecto será a posta en marcha dunha *LINEA TELEFÓNICA* (chamadas, whastapp), que funcionará entre as 9:00 e as 17:00 horas, de luns a venres, e que será atendido polos diferentes profesionais de Afalu (psicólogos, educadores sociais, traballadores sociais, monitores de ocio e tempo libres, auxiliares/xerocultores, mediadora comunicativa, terapeuta ocupacional

A intervención basearase nos seguintes principios:

- Empatía

- Respecto

- Confidencialidade

- Escoita activa

- Atención centrada na persoa.

Durante as chamadas buscarase establecer unha conversa cercana, que permita á persoa

expresar os seus sentimentos, preocupacións ou necesidades

Esta liña telefónica recibirá as chamadas, e deseñarase unha intervención individualizada de cada persoa que chame (realizado en conxunto de todo o equipo multidisciplinar de Afalu), para dar resposta ás necesidades que plantexe.

Esta intervención, adaptada e personalizada, contempla para cada persoa beneficiaria:

- Avaliación do seu estado, tanto a nivel social, emocional e psicolóxico, para determinar o posible impacto da soidade non desexada no seu estado e establecer accións para minimizar as consecuencias detectadas. Esta avaliación realizarase en diferentes momentos durante a execución do proxecto, tendo principalmente, unha avaliación inicial (para determinar o punto de partida), e unha avaliación final (para coñecer o impacto do proxecto) . Para realizar esta avaliación os diferentes profesionais serviranse tanto de test estandarizados como de outros medios.
- Realización de chamadas e outros contactos, periódicos, de seguimento a cada persoa, coa finalidade de establecer tempos de escoita e conversación, para coñecer cada certo tempo, como se atopa, novas necesidades plantexadas, etc., e favorecer o contacto e interacción social con alguén aínda que non xurda ningunha nova demanda
- Intervención psicolóxica individual (tanto a nivel presencial como telemático-videochamada), de ser o caso entre as persoas participantes, para facilitar orientación e apoio emocional, por trastornos emocionais ou psicolóxicos, tales como ansiedade, tristeza, depresión, etc.
- Creación, de ser o caso, e funcionamento, de xeito periódico, de reunións presenciais de beneficiarios do mesmo concello ou de concellos limítrofes, para favorecer a creación de lazos sociais e interaccións sociais entre beneficiarios.
- De ser o caso, talleres e actividades lúdicas de socialización, nos diferentes concellos nos que se prevé se desenvolverá o proxecto
- De ser o caso, contacto e derivación a servizos especializados (sanitarios, sociais ou de outra índole) para dar resposta á necesidades plantexadas polas persoas que chamen ao teléfono e que non poidan ser resoltas coa intervención directa do equipo técnico de Afalu

A actuación diríxese prioritariamente a persoas maiores de 65 anos enfermos de Alzheimer e de deterioro cognitivo, no ámbito territorial da provincia de Lugo, especialmente aquelas que presenten factores de risco asociados ao illamento social ou á soidade non desexada.

II. Obxectivos

Obxectivo xeral do proxecto:

- Previr e reducir a soidade non desexada, especialmente, serán beneficiarias do proxecto fundamentalmente, as persoas maiores de 65 anos enfermos de Alzheimer e de deterioro cognitivo, no ámbito territorial da provincia de Lugo .

Obxectivos específicos do proxecto:

- Identificar persoas con deterioro cognitivo e en situación de soidade non desexada
- Proporcionar acompañamento, apoio emocional e detección de situacións de risco na poboación beneficiaria.
- Detectar e previr situacións de risco, que se poidan dar nos domicilios, derivados ou non da soidade non desexada, como por exemplo: pensamentos auto líticos, inseguridade no fogar, maltrato, caídas ou aparición de deterioro cognitivo (froito do illamento e a inactividade).
- Adaptar a intervención, ás necesidades específicas dos participantes, tendo en conta factores como o contexto, o grao de illamento ou posibles limitacións físicas.
- Favorecer a creación de vínculos sociais entre os participantes, promovendo tempos e espazos de encontros, para xerar confianza e interacción social.
- Fomentar a participación comunitaria das persoas maiores, facilitando a súa implicación noutras actividades sociais e culturais do seu entorno así como evitar que as persoas coidadoras se illen da vida social comunitaria. -

III. Avaliación e informe de resultados

Centraremos a avaliación nos seguintes momentos:

Para a formulación do proxecto realizamos unha AVALIACIÓN INICIAL, para detectar a necesidade dun proxecto destas características, de interese socio-sanitario.

Durante a posta en práctica do proxecto, realizaremos unha avaliación do proceso. Avaliaremos a mellora da calidade de vida das persoas participantes, coa observación e avaliación individual de cada un deles por medio de chamadas de seguimento personalizadas e cuestionarios de avaliación tanto do seu estado, como de valoración do proxecto.

Atenderemos as dúas funcións da avaliación, é dicir, realizaremos unha avaliación formativa, ao longo do proceso, coa finalidade de reconducir algunha das actividades e adaptalas de forma máis adecuada as características e necesidades das persoas participantes, así como unha avaliación sumativa, ao final do proceso, co obxectivo de

avaliar o proxecto e de introducir, de ser o caso, novas propostas de mellora para repicalo en próximos anos.

Para esta última teremos en conta a avaliación formativa, a través dos informes de seguimento de cada participante, os cuestionarios de avaliación, así como calquera suxerencia que transmitan.

Para avaliar o impacto do proxecto nas persoas participantes, empregáranse entre outros os seguintes indicadores:

- Número total de persoas atendidas
- Frecuencia dos contactos establecidos, tanto por iniciativa dos destinatarios, como dos contactos de seguimento
- Nivel de satisfacción dos usuarios
- Redución, percibida, do sentimento de soidade e de outros problemas derivados
- Casos/demandas resoltos polo equipo de profesionais de AFALU logo da súa intervención
- Casos derivados a outros servicios especializados.

Entre os resultados esperados atópanse:

- Diminución do sentimento de soidade.
- Mellora do benestar emocional.
- Incremento da conexión social das persoas beneficiarias
- Detección temperá de situacións de vulnerabilidade.

En resumo, o proxecto "TEMPO DE ESCOITAR": Atención telefónica de apoio para persoas maiores con alzheimer e outras demencias en situación de soidade non desexada de Lugo, representa unha iniciativa social importante, para mellorar a calidade de vida de persoas en situación de illamento. A través dun servizo accesible e humano, que pretende ofrecer apoio emocional, previr problemas sociais e fomentar a inclusión e o benestar.

ANEXO III

Modelo de declaración de cesión e tratamento de datos en relación coa execución de actuacións do plan de recuperación, transformación e resiliencia (PRTR)

*Don/Dona....., DNI....., como presidente da
entidade....., con NIF....., e domicilio fiscal en*

.....
...

beneficiaria de axudas financiadas con recursos provenientes do PRTR que participa como titular do Proxecto TEMPO DE ESCOITAR contra a soidade non desexada no desenvolvemento de actuacións necesarias para a consecución dos obxectivos definidos na liña de inversión I2 do proxecto número 6 (Proxectos de Innovación dos servizos sociais) incluído no Compoñente 22 "Economía dos coidados e reforzo das políticas de igualdade e inclusión social", declara coñecer a normativa que é de aplicación, en particular os seguintes apartados do artigo 22, do Regulamento (UE) 2021/241 do Parlamento Europeo e do Consello, do 12 de febreiro de 2021, polo que se establece o Mecanismo de Recuperación e Resiliencia:

1. A letra d) do apartado 2: «d) a efectos de auditoría e control e para dispoñer de datos comparables sobre o uso de fondos en relación coas medidas destinadas á execución de reformas e proxectos de investimento no marco do plan de recuperación e resiliencia, solicitar e asegurar o acceso ás categorías harmonizadas de datos seguintes:

- i. O nome do perceptor final dos fondos;*
- i. Os nomes, apelidos e datas de nacemento dos titulares reais do perceptor dos fondos, segundo se define no artigo 3, punto 6, da Directiva (UE) 2015/849 do Parlamento Europeo e do Consello;*
- ii. Unha lista de medidas para a execución do proxecto no marco do plan de recuperación e resiliencia, xunto co importe total do financiamento público de ditas medidas e que indique a contía dos fondos desembolsados no marco do Mecanismo e doutros fondos da Unión».*

2. Apartado 3: «Os datos persoais mencionados no apartado 2, letra d), do presente artigo só serán tratados polos Estados membros e pola Comisión para os efectos e duración da correspondente auditoría da aprobación da xestión orzamentaria e dos procedementos de control relacionados coa utilización dos fondos relacionados coa aplicación dos acordos a que se refiren os artigos 15, apartado 2, e 23, apartado 1. No marco do procedemento de aprobación da xestión da Comisión, de conformidade co artigo 319 do TFUE, o Mecanismo estará suxeito á presentación de informes no marco da información financeira e de rendición de contas integrada a que se refire o artigo 253 do Regulamento Financeiro e, en particular, por separado, no informe anual de xestión e rendemento».

Conforme ao marco xurídico exposto, manifesta acceder á cesión e tratamento dos datos cos remates expresamente relacionados nos artigos citados.

....., de de 202.....

Asdo.

Cargo:

ANEXO IV

Modelo declaración de compromiso en relación coa execución de actuacións do plan de recuperación, transformación e resiliencia (PRTR)

Don/Dona con DNI, como presidente da entidade....., con NIF....., e domicilio fiscal enna condición de beneficiaria de axudas financiadas con recursos provenientes do PRTR que participa como titular do Proxecto TEMPO DE ESCOITAR contra a soidade non desexada, no desenvolvemento de actuacións necesarias para a consecución dos obxectivos definidos na compoñente 22 “Plan de choque para a Economía dos Coidados e Reforzo das políticas de igualdade e inclusión” e investimento I2 “Plan de Modernización dos Servizos Sociais: Transformación tecnolóxica, innovación, formación e reforzo da atención á infancia”, manifesta o compromiso da entidade que representa cos estándares máis esixentes en relación co cumprimento das normas xurídicas, éticas e morais, adoptando as medidas necesarias para previr e detectar a fraude, a corrupción e os conflitos de interese, comunicando no seu caso ás autoridades que proceda os incumprimentos observados.

Adicionalmente, atendendo ao contido do PRTR, comprométese a respectar os principios de economía circular e evitar impactos negativos significativos no medio ambiente («DNSH» polas súas siglas en inglés «do no significant harm») na execución das actuacións levadas a cabo no marco do devandito Plan, así o compoñente 22, Investimento 2 do Plan de Recuperación, Transformación e Resiliencia establece que os equipos utilizados cumprirán cos requisitos de eficiencia de materiais establecidos de acordo co Regulamento (UE) 2024/1781 para servidores e almacenamento de datos, ou computadores e servidores de computadores ou pantallas electrónicas. Os equipos non conterán as substancias restrinxidas enumeradas no anexo II da Directiva 2011/65/UE, excepto cando os valores de concentración en peso en materiais homoxéneos non superen os enumerados no dito anexo. Ao final da súa vida útil, o equipo someterase a unha preparación para operacións de reutilización, recuperación ou reciclaxe, ou un tratamento adecuado, incluída a eliminación de todos os fluídos e un tratamento selectivo de acordo co Anexo VII da Directiva 2012/19/UE e manifesta que non incorre en dobre financiamento e que, no seu caso, non lle consta risco de incompatibilidade co réxime de axudas de Estado.

....., de de 202.....

Asdo.

Cargo: